

Bortadura mesi de Austu 2022 – Agosto 2022

01/08/2022 – 02/08/2022

ELETZIONIS POLÌTICAS 2022 – VOTU PO IS CHI BIVINT FORAS DE S'ITÀLIA

Cun su decretu n. 96 de su 21 de argiolas 2022 su Presidenti de sa Repùblica at scapiu is càmeras. Cun su decretu 97 de sa matessi diri at decidìu ca is eletzionis ant a èssiri su 25 de cabudanni 2022.

Is citadinus chi bivint a foras de s'Itàlia ant a votai po is candidaus de sa Circostrizioni èstera. S'amentat ca votai est unu deretu amparau de sa Costitutzioni e ca (segundu sa lei n. 459 de su 27/12/2001 e de su Regolamentu de atuatzioni cosa sua cun D.P.R 2 de abrili 2003 n. 104) is citadinus italianus iscritus me in is listas elettoralis e chi bivint a s'èsteru, DEPINT VOTAI PO LÌTERA.

Sa normativa, chi previdit de votai a s'èsteru cun sa lìtera, lassat aberta sa possibilidadi de votai in Itàlia puru, a patu ca si scèberit tempus a innantis d-ònnia borta chi nci funt eletzionis. Si pedit a is citadinus chi bivint a foras de s'Itàlia de s'assegurai ca is datus anagràficus insoru siant giustus, e a ddus curregi a su Consolau chi funt sballiaus.

S'avisant a totus is eletoris chi bivint a foras de s'Itàlia e chi funt iscritus a s'A.I.R.E. ca podint sceberai de votai in Itàlia intre de su 31 de argiolas 2022 (sa de dexi diri a pustis de sa convocatzioni de is votatzionis). Depint cumpriri su mollu e tocat a ddu intregai a s'Ufitziu de su Consolau in sa circostrizioni aundi bivint s'eletori.

Chi s'eletori scèberat de ndi torrai a Itàlia po votai, non nc'at a èssiri rimbussu de is spesas de viàgiu ma sceti tarifas baratas. Sceti me in is Natzionis aundi non si podit votai po lìtera (Lei 459/2001 art. 20, comma 1-bis) a is citadinus ddis ant a torrai su 75% de su dinai chi ant spendiu po viagai cun sa tarifa prus bàscia.

03/08/2022

Su Comunu de Santui Giuanni Suèrgiu fait sciri ca, cun **s'ordinàntzia de su dirigenti N° 10-2022**, at decidìu sa proibidura temporànea de su tràficu in s'interis de sa prucezioni religiosa e de sa festa de Sant'Aleni Imperadora su 18 de austu 2022 in Matzàcara.

Càstia innoi po ligi s'ordinantzia

<https://bit.ly/3Sm5Mey>

03/08/2022

AVISU PÙBLICU PO PIGAI PARTI A PROGETUS PENTZAUS PO D-ÒNNIA PERSONA (PERSONALIZZATI) CUMENTI NARAT SU PROGRAMA REGIONALI "DOPO DI NOI".

Si fait sciri ca si pòdiri inghitzi a presentai is dimandas po pigai parti a su programa "DOPO DI NOI" (cunforma a sa Lei 112/2016) chi tenit sa bidei de donai agiudu a sa genti cun disabilitadi gravi chi non tenit apògiu familiari.

Is paperis depint essi intregaus a manu a s'Ufitziu Prìsia o a sa e-mail ufficio.protocollo@pec.comune.sangiovanisuergiu.ci.it in unu ùnicu file PDF intra de su 16/09/2022.

Po àteras informatzionis castiai s'Avisu pùblicu, is mollus e is paperis me innoi:

<https://bit.ly/3zSalGC>

03/08/2022

Ordinàntzia de su dirigenti n° 11-2022 – proibidura temporànea de tràficu e de parada in s'interis de is notis cun mùsica e karaoke me in is localis de santu giuanni suèrgiu, in s'istadi 2022.

Ligi s'ordinantzia intrea:

<https://bit.ly/3PX9ZUF>

03/08/2022

🔊 Reverendo Jones Live 🔊

Aundi?

📍 Me in su bar Brubero, in bia Mazzini n° 10, Santu Giuanni Suèrgiu.

Candu?

📅 Sàbudu su 13 de Austu, de is 9 oras de noti.

📌 At a èssiri cosa spassiosa meda, no si ddu scaresciais!



03/08/2022

T'iat a praxi a tastai unu **street food diversu?**

Ti naru 5 arrexionis poita non dd'as a agatai unu cumentu de su nostu!

Genti de d-ònnia parti de su Mundu

At a èssiri unu festival de folclori, is participantis ant a ammostai sa cosa de papai tìpica de su Paisu cosa insoru, cun mùsica, ballus e costùminis.

Is protagonistas

Is chi ant a coxinai non funt coxineris de mestieri ma òminis e fèminas chi ant decidu de bivi in Sardinnia e allogant in su coru sa terra e is traditzionis insoru.

S'arrosu est su rei

Sa manifestatzioni tenit unu tema comunu chi andat beni a totus is pòpulus stràngius.

Cust'annu at a essi s'arrosu: d-ònnia parada at a coxinai su pratu tìpicu cosa sua fatu de arrosu...e àteru puru!

Su billetu

Su billetu costat 10 èurus e si pòdiri imperai po comporai 8 èurus de cosa de papai: si ant a pòdiri pigai pratus de 3, 5 e 8 èurus.

TASTUS

d-ònnia comunidadi at a cuncordai pratixeddus de 3 èurus poita su scopu est de fai tastai a sa genti prus de una specialidadi stràngia.

Unu agiudu po s'Ucraina

S'amiga nosta Natalia tenit abbisòngiu de agiudu po coberai mexinas e cosas chi non si ndi podint fai de mancu po ddas portai a Ucraina. In s'interis de sa manifestatzioni nci at a èssiri una mesixedda po ndi arregòlliri is cosas: chini dda bolit agiudai tzerrit a Natalia a su nùmeru 389 025 5103.



08/08/2022

AVISU PÙBLICU "REIS" (RÈDDITU DE INCLUSIONI SOTZIALI) SEGUNDA PARTI.

Misura regionali nomenada REIS (Rèdditu de inclusioni sotziali) – Annu 2021, segunda parti. Presentada de is dimandas intre de su 31/10/2022.

Su Comunu de Santu Giovanni Suèrgiu fait sciri ca at abertu is acabus po fai sa dimanda po su REIS – segunda parti. Dda podint fai is famìlias chi non tenint tìtulus po pediri su REIS – prima parti, su RDC (Rèditu de Citadinantzia) o àteras formas de agiudu in dinai. Custa misura est po is famìlias ca s'agatant in stadu de incòmudu sotziali e econòmicu po mori de su Covid e po cussas ca pregontant po sa primu borta a is Serbìtzius Sotzialis.

Tocat a intregai is dimandas impari a totus is paperis chi serbint intre e no avatu de su 30/10/2022. Tocat a cumpriri sceti su mollu nomenau "Modulo domanda" chi agatais sighendi custu acàpiu e a ddu intregai a manu a s'Ufitziu Prìsia de su Comunu de Santu Giovanni Suèrgiu. Chi ddu imbiais a sa mail

ufficio.protocollo@pec.comune.sangiovannisuergiu.ci.it tocat a ddi poni cumenti de Ogetu: RICHIESTA DI ACCESSO ALLA MISURA REGIONALE DENOMINATA REIS 2021 PARTE SECONDA.

Càstia innoi po ligi àteras informatzionis:

<https://bit.ly/3PYSvHi>

08/08/2022

CUNCESSIONI PO IMPERAI SA PALESTRA COMUNALI, STAGIONI 2022/2023. APROVADA SA GRADUATÒRIA.

Si fait sciri ca cun detèrmina n. 367 de su 02/08/2022 s'Ufitziu de su Sport at aprovau sa graduatòria de is assòtzius sportivus chi ant pediu de impreai sa Palestra Comunali de bia

Mascagni po sa stagioni 2022/2023. Innoi agatais sa graduatòria e su calendàriu cun oràrius giai pigaus e liberus.

S'at a pòdiri dimandai de imperai sa palestra me in is oràrius ancora liberus, donendi sa precedèntzia a is assòtzius chi ant giai pigau parti a s'Avisu ma chi non ddu ant bintu e chi pedint unu càmbiu de oràriu (depint fai dimanda intra is s'acabu fissau (3 diris a pustis de custa nova).

Innoi is paperis: <https://bit.ly/3Q6KmQW>

08/08/2022

LEI 162/98 - PROGETUS PENTZAUS PO D-ÒNNIA PERSONA (PERSONALIZZATI) CHI TENIT DISABILIDADI GRAVI. OBERTURA DE IS TÈRMINIS.

PRESENTADA DE IS DIMANDAS PO S'ANNU 2022.

Si fait sciri ca, posta in atu sa delibera de sa Giunta Regionali n. 50/44 de su 28.12.2021 e a pustis de s'acraramentu de sa nota regionali de su 27/05/2022, si pòdiri fai dimanda po is progetus de agiudu cumenti narat sa Lei 162/98 po is chini ddis ant arreconnotu una disabilitadi gravi segundu s'articulu 3, comma 3 de sa Lei 104/92, intra e no avatu de su 30/10/2022.

Si precisat ca custus progetus s'ant a incarrerai sceti chi nci at a essi dinai disponibili e is dimandas ant a s'ghiri s'òrdini cronològicu de l'òmpida.

Is dimandas depint essi intregadas intra de su 30 de cabudanni 2022. Is chi no tengant a cussa diri su verbali cunforma a sa Lei 104/92, dda podint intregai no avatu de su 02/11/2022.

Po totus is informatzionis ligei s'avisu e is paperis chi agatais in custu acàpiu:

<https://bit.ly/3Q9AZjU>

08/08/2022

ELETZIONIS POLÌTICAS 2022 – Italianus chi bivint de manera temporànea foras de s'Italia. Cumenti si votat.

Is eletoris chi bivint de manera temporànea a foras de s'Italia, po a su mancu tres mesis in s'interis de su 25 cabudanni 2022, podint pediri de votai po currispundèntzia fadendi sa dimanda a su Comunu aundi funt iscritus cumenti de eletoris. Custa dimanda depit essi fata trintaduas diris a innantis de sa diri de votu, est a nai intra de su 24 de austu 2022.

Sa dimanda si depit fai imbiendi una mail opuru intregendi su paperi a su Comunu, mancai non ddu fatzat s'interessau.

Sa dimanda depit essi fata in unu paperi sena de bullu (carta libera) impari a su documentu de identidadi de s'eletori. Nci depit essi puru s'indiritzu èsteru aundi s'at a imbiai

s'imboddicàmini elettorali e una decraradura de is tìtulus cunforma a su comma 1 de s'art.4-bis de sa lei n. 459/2001. Me in s'acàpiu agatais su mollu in pdf de cumpriri.

S'eletori at a decrarai s'indiritzu temporàneu de domu sua aundi at a bivi a su mancu po tres mesis in s'interis de su 25 de cabudanni 2022.

Su tèrmini po intregai is dimandas (24 austu) est categòricu e non si podit cambiai poita serbit tempus po fai totus is fainas: su Ministèriu depit tenni crara sa lista de is eletoris èsterus po ddis pòdiri imbiai is paperis.

Po is familiaris chi bivint impari a s'eletori sa lei non previdit de ddis circai is tres mesis de residèntzia temporànea a foras de s'Italia.

Votu de is militaris e is eletoris chi bivint me in is ambasciadas e is consolaus.

Su Ministèriu de is Afàrius Èsterus, su Ministèriu de s'Internu e su Ministèriu de sa Defensa, in atuazioni de s'art.4-bis de sa lei n.459/2001, ant decidu is maneras tènnicas e pràtigas po fai votai is chi traballant me in is Fortzas Armadas e in Poltizia a foras de s'Itàlia poita funt fadendi missionis internatzionalis e puru po is eletoris aposentaus me in is ambasciadas e consolaus.

Ligi innoi po àteras informatzionis:

<https://bit.ly/3zVwuUw>

08/08/2022

●Comunu de Santu Giuanni Suèrgiu

Si fait sciri ca s'Ufitziu Lìngua Sarda at a èssiri serrau de oi fintzas a su 21 de austu. Si torraus a biri su 22 de is 09:00 me in sa biblioteca de bia Mazzini.

Pasiai-sì e passai-sì bonu Mesaustu!



08/08/2022 - 09/08/2022

Sa paràula Mesaustu ndi bennit de su latinu Feriae Augusti (su pàsiu de Augustu) chi marcàt una festa fundada de s'Imperadori Augustu in su 18 a.C. po dda aciungi a is àteras festas chi nci fiant in su matessi mesi, cumentis is Vinalias rustica, is Nemoralia e is Consualia. Fiat unu periodu de pàsiu e de festa chi ndi benniat de is Consualia, ca fiant festas po s'acabu de is traballus de su sartu, nomenadas aici poita fiant intituladas a Conso, su deus de sa terra e de sa fertilitàadi. Su Mesaustu Antigu serbiat po promovi s'atividadadi politica de s'Imperadori e po fai unu bellu periodu de pàsiu apicighendi is diris de festa de austu prus de importu, aici sa genti si podiat pasiai a pustis de ai traballau meda me in su sartu me in is cidas passadas. In custas festas nci fiat genti currendi a cuaddu e a is bois, molentis e mulas ddis cuncordànt froris a pitzus. Oindì is matessi usanzas s'agatant ancora in Siena me in su "Palio dell'Assunta" de su 16 de austu. Su nomini palio ndi bennit de su latinu pallium ca fut su drapu de arroba pretziosa ca donàt a is bincidoris de sa cursa a cuaddu me in is tempus de is Romanus.

Sa festa, in s'antigòriu, fiat sa primu diri de austu; a pustis sa Crèsia dd'at atramudada a su 15 po dda fai torrai paris a sa festa religiosa de s'Assuntzioni de Maria.



09/08/2022

Prontus seis po si scallai de s'arrisu e si spassiai? Intzandus non si ndi scaresciais de benni a biri Marco Piccu- Tziu Pibioni ca presentat su spetàculu suu "Come piangere, ridendo".

Cenàbara 12 austu 2022

A is 22:00

Pratza IV Novembre in Santu Giuanni Suèrgiu.

Marco Piccu at a fai chistionai is personàgius cosa sua prus connotus: Tziu Pibioni, Eliseo Mandroni, Tanalla, Diablo e Benvenuto.

Lobai de si dd'arregorai, ca at a essi scialosu meda!



22/08/2022

ELETZIONIS POLÌTICAS – VOTU DE DOMU

Si pùblicitat s'avisu po acrarai is modalidadis de su votu de domu po is eletoris chi tenit infermedadis grais e chi funt atacaus a is aparèchius mèdicus ca non si podint movi de domu insoru.

Is dimandas si depint intregai dae su 16 de austu a su 5 de cabudanni sighendi su chi narat s'avisu.

Càstia s'acàpiu: <https://bit.ly/3cetAkz>

22/08/2022 – 23/08/2022

Sa cresiedda scunsagrada de Santu Giuanni s'agatat a foras de sa bidida, mancai in s'antigòriu fiat sa crèsia parrochiali. Su territòriu tenit distimòngius de sa presèntzia de s'òmini giai de s'edadi preistòrica. Ddoi funt scedas de sa crèsia giai in su 1341 ma ammancant cussas asuba de s'apòsentu de edadi romànica ca si pentzat siat de su sèculu XIV. Mancai non si scìpiat de manera segura si pentzat chi sa primu pesada dd'iant fata intre sa fini de su sèculu XIII e s'inghitzu de su XIV. Dd'ant imperada cumenti de crèsia parrochiali finas a su 1935. Oindì sa cresia est sceti unu sciàsciu sena de cabertura. Abarrant ancora in pei su muru de sa faciada sud-ovest de 8 metrus e 20 e calincunus arrogus de su costau a cabu de susu fatu de calcite e trachite. Innoi s'agatat una fentana manna e sena de spartziduras (monofora) e una genna incroada (architavata) cun sa perra de luna a bicu tundu (lunetta a tutto sesto). Su portali est incroau cun arcu de scàrrigu. In su arrenconi a manu manca ddoi est unu arroccu de perda aundi est scrapeddada una cruxi arega a intru de unu scudu romànicu.

Sa cresia bècia dd'ant pesada is paras Benedetinus faci a s'annu Milla; a pustis, prus o mancu in su 1400, dd'ant aciuntu sa domu parrochiali. Custus càmbius si podint biri immoi puru castiendi-ddi ancora is arrestus: ddoi at unu ammesturu de perdas, cussas de trachite bianca chi arribant de sa primu pesada e àteras pigadas de su territòriu acanta po dda torrai a fai noa. In su 2000 is piciocheddus chi iant apenas fatu sa crèsima iant scritu, in su notiziàriu parrochiali nomenau "Il Ponte", unu artìculu asuba de su stadu de sa crèsia e iant fatu dimandas a su meri de insaras. Sa crèsia infatis est una proprietadi privada poita me in is annus coranta su Muntzegnori Pirastu dd'iat bèndia a Pietro Massa e a pustis, passada a s'aredeu cosa sua, dd'ant imperada cumenti de magasinu e stadda. A palas de sa crèsia ddoi est unu campusantu chi immoi est totu prenu de erba mala: impari a sa crèsia dd'ant abandonau e ant tramudau s'edifitziu a prexeri insoru po ddu imperai cun is arresis. Chi sa comunidadi boliat sa crèsia su proprietàriu dda bendiat puru, cun su prètziu dimandau de su mercau.

24/08/2022

Su medau de Is Loccis Santus est sceti unu de is chi s'agatant in totu su Sulcis e pruschetotu in su tretu de Santu Giuanni Suèrgiu, casi ca nci ndi funt prus o mancu ancora sessanta e in custu logu fiat prenu giai de su Setixentus. Is medaus fiant muntoneddus de domus; is prus mannus ndi teniant una bintina aundi ddoi biviant is famìlias chi traballànt sa terra e chi pasciant is pegus; bortas medas su nòmini de is medaus ndi beniat pròpiu de sa familia chi fiat andada a bivi ingunis po primu. Oindì sa majoria de is medaus est sboida po mori de essi aici atesu de sa bidida prus manna (difatis sa genti si fiat mòvia de is medaus conca a Santu Giuanni) e poita fiant mudadas is fainas de fai.

Po nai sa beridadi, calincunu medau (Is Loccis, Is Collus e Is Urigus) chi oindì s'est puru ammanniau, no fiat sboidu ma teniat fàbricus de imperai, cummenti sa scola elementari chi ant serrau poita ammancànt scientis e costàt meda a dda mantenni.

Su medau de Is Loccis Santus est unu esempru craru de custus biddiciolus carateristicus chi s'agatant in su Sulcis. Non s'est mai sboidau de unu totu e de binti annus a custa parti una de is primu familias dd'at fatu traballus po ndi torrai a noa calincuna domu, gràtzias a una faina manna de filologia e circhendi de arrispetai s'architettura originària fintzas a ddas ai tramudadas in domus bellas po is turistas. Totus is domus funt fatas cun matonis de làdiri (fatus cun argidda agatada inguinis acanta) e cun is crobeturas de linna e canna cummenti si fadiat in s'antigòriu.

Is arregiolas e sa mobìlia puru ddas ant fatas is maistus a manu e po fintzas is coloris de is murus de foras ddus ant cuncordaus ammettere sustàntzias e pighendi-ddus de froris e matas.

24/08/2022 - 30/08/2022

Dda connoscis sa necròpoli de Is Loccis Santus?

Ddu sciiast ca ddoi funt 13 tumbas a domus de janas e impari a sa de Montessu, me in Sa Baronia (Villaperuccio) est una de is necròpolis prus de importu me in su Sulcis?

◆ Is studiosus pentzant ca dd'ant imperada po sa primu borta me in su neolìticu prus o mancu faci a su 3000 a.C., candu in totu sa Sardinnia fiat spainada sa cultura de Otieri. Sa majoria de is repertus agataus me in custas tumbas appartennit a sa cultura de su vasu a bisura de campana (cultura del vaso campaniforme), spartu in cussus tempus in totu s'Europa. Funt ceràmicas bellas e apretziadas meda, pintadas cun puntinus e marcus coloraus me in unu sfundu scuriu o nieddu. Custus repertus s'agatant oi me in su museu **Villa Sulcis** de Carbònia e funt de sa colletzioni Doneddu.

◆ Sa necròpoli de is Loccis Santus dd'ant imperada po sèculus medas, assumancu fintzas a su cumentzu de su duamila a.C. innantis de dda lassai sboida. Sa cosa prus spantosa est ca sa planimetria de calincuna de is grutixeddas tenit sa bisura de unu frori cun is follas abertas e est una cosa ca s'agatat sceti in su Sulcis. Is tumbas fiant serradas cun una pedra manna e a palas nci fiat una àtera gennixedda, cumenti cussa chi si agatat me in is tumbas egìtzias. Custu est spantosu poita creiant ca nci fiat atra vida a pustis de sa morti, e in sa tumba, cun is mortus, nci poniant totus is strepus (collanas e arropa) ca ddis ant a essi serbius me in s'atru mundu.

◆ De importu mannu est sa tumba III castiendi a manu dereta de s'intrada de sa necròpoli: est s'ùnica pintada a intru e tenit una planimetria longitudinali e dromos po intrai; sa matessi cosa s'agatat in sa de cuatro tumba, posta in pitzeddu, chi tenit unu curridòriu imperdau a piticu. Acanta s'agatat puru unu menhir sciorrocau. Àterus meda ndi ddoi at in totu su tretu allacananti. Me in s'altura a palas de sa necròpoli ddoi est ancora unu nuraxi monoturri piticu e mesu sciusciau.

◆ Me in is tumbas V e IX (una de is duas dd'at allomingiada "Margherita" sa ghia, poita tenit sa planimetria de unu frori) is archeòlogus ant agatau arropa de unu arcieri: una collana fata de ossus de sirboni e corrus de mari, unu punniali e unu brassard cumenti si podit biri in sa fotografia (primu cummentu innoi asuta). Su **brassard** est fatu de perda de colori birdi-castàngia e serbiat a s'arcieri po dd'amparai su bratzu e prus che totu su burtzu candu tirat sa frècia. A pitzus est tacheddau cun custus sìmbulus: su soli, una brebei, unu pastori, is nùmerus romanus VI, II, X, e unu pisci.

◆ Tocat a nai ca sa bellesa de custu situ archeològicu non nd'arribat sceti de is arrastrus (tracce) de is civiltadis antigas. Difatis a pitzus de sa sedda, nci funt calincunas postas contra is ariopranus (postazioni antiaeree) de sa segunda gherra mundiali chi perou non si podint visitai.

❖ In ùrtimu, de custu logu si podit gosai unu de is panoramas prus incantadoris de su Sulcis: a ovest si bit s'ìsula de Sant'Antiogu cun sa lurtzina, a norti s'ìsula de Santu Perdu e a sud su grofu de Pramas fintzas a Cabu Teulada.

🏠 Si torrat gràtzias meda a sa ghia Claudia Secchi ca at contau cun abilesa e amori sa stòria de sa necròpoli e de su territòriu.

📞 Po bisitai su situ tocat a pigai cuntatus cun sa Proloco de Santu Giuanni Suèrgiu a su numeru 0781 052265 opuru circhendi a s'Associazione Quadrifoglio 95.

29/08/2022

Sa cumpangia teatrali "Is Suerxinus" cun s'amparu de su Comunu de Santu Giuanni Suèrgiu presentat: sa cummèdia in atu ùnicu in lingua sarda, nomenada "Is massàias fendi su pani", pentzada, scritta e cun sa regia de Anna Simbula Marras.

Sàbudu 3 de cabudanni 2022 a is 21:30 me in su giardinu Emanuela Loi de s'Aposentu de su Cunsillu Comunali de Ruga Roma, Santu Giuanni Suèrgiu.

Is atoris: Ignazia Prinzi, Carmen Dessi, Donatina Colella, Vilma Steri, Paola Cocoli, Rina Pinna, Ambra Spano, Giuseppe Argiolas, Fausto Locci.

Benei-ddoi ca at a fai scialai meda!



29/08/2022 - 31/08/2022

Arroca a bisura de cristianu.

Prus a innantis de su medau de Is Loccis Santus tocat a furriai a manu dereta e a lassai sa màchina a pustis de su ponti: de ingunis si caminat po 1 chilometreddu. S'agatat acanta de su medau de Is Ùrigus, in su costau de sa sedda de Crabonàxia, a palas de sa necròpoli de Is

Loccis Santus. De calincunu annu, custa arroca a bisura de cristianu, ndi fait aproliai curiosus de d-ònnia logu.

Est un'atza (spuntone) de trachite manna meda ca arregordat sa cara de un òmini: si bint is cillus, su nasu, sa buca, su mentu, e, po custa arrexioni, genti meda pentzat ca siat s'arrastru de cultus preistòricus, de sa civiltadi egìtzia. At a essi po cussu ca dd'ant nomenada "Sfinge". Po nai sa beridadi non si podit nai cun seguresa chi s'arroca est aici poita ca ndi bennit de una civiltadi antiga opuru poita su soli, s'acqua e su bentu de sèculus meda dd'ant scurpida. Naraus ca s'ipòtesi chi torrat paris cun sa beridadi est ca est su tempus chi at fatu s'arroca a bisura de cristianu, poita in Sardìnnia non ddoi funt cosas simbillantis po ddas cunfrontai. A d-ònnia manera candu s'agataus faci a pari cun un'arroca naturali caraterìstica cumentu de custa est dificili a s'aturai calmus.

30/08/2022

Totu sa popolatzioni de Santu Giuanni Suèrgiu at afestau a tzia Annetta Pisanu, nàscia su 29 de austu de su 1922, ariseru at fatu cent'annus!

Ancora non si ddu podit crei nimancu issa, at passau sa diri impari a fillus, nebodis e netas, paisanus e totu s'aredeu cosa sua, cummovia e allirga po sa grandu stima chi dd'ant donau. Giai non nci at a essi calinuna cosa de buffai po fai allonghiai sa vida? Tzia Annetta narat ca nou!

Norabbonas! S'ufitziu de lingua sarda de su Comunu ddi augurat a ndi connosci àterus annus medas in saludi e in serenidadi.